





止齋先生文集卷之十一

外制自紹熙四年正月以後

皇后歸謁家廟親姪忠訓郎閣門宣贊舍人幹辦軍頭司李孝純武經郎帶御器械幹辦皇城司李孝友各特轉右武郎

敕具官某等朕惟古后妃有求賢審官之志而不私謁而人主則特隆於肺腑之親夫惟后妃彌遜人主彌恩斯可觀已日者吾后省家廟爾某皆以猶子祗服厥事朕何愛一橫行郎而不以寵汝惟無忝爾祖以長守富貴則予汝嘉可

皇后親姊故任武節郎閣門宣贊舍人致仕霍漢臣妻平涼郡夫人李氏封成國夫人故任武經郎致仕馬煥妻安化郡夫人李氏封信國夫人忠訓郎士廉妻彭原郡夫人李氏封崇國夫人



教朕惟古后妃有求賢審官之志而不私謁而人主特隆於肺腑之親夫唯后妃彌遜人主彌恩斯可觀已具位某氏夙以淋惠友于坤儀日者翟車還省家廟越來相事禮無違者其益湯沐視君夫人尚服寵榮以綏壽祉可

皇后親姪孫承節郎李瑜李繁各轉兩官

教具官某等日者吾后還省家廟朕循故事推恩后族自及及早罔或遺者尔以幸會爰進二階豈不榮哉尚務增共以綏爾祉可

皇后親姪婦故忠訓郎贈文州刺史李斌妻安人潘

氏右武郎帶御器械幹辦皇城司李孝友妻安人趙

氏親姪女通直郎充點檢贍軍激賞酒庫所幹辦公

事韓松妻安人李氏並特封恭人親姪孫孫女方武

郎帶御器械幹辦皇城司李孝友女孺人李氏特

封安人

教具位某氏朕惟古后妃有求賢審官之志而不私謁而人主則特隆於肺腑之親夫惟后妃彌遜人主彌恩斯可觀已日者吾后省家廟爾以猶子實來相禮朕嘉與之用益汝封尚服寵榮以無違我齊家之化可

皇后親姪女夫通直郎充點檢贍軍激賞酒庫所幹

辦公事韓松特轉一官

教具官某日者吾后還省家廟朕循故事且酌有司之議推恩后黨而爾未自勲闕雅有能稱眷在甥館亦與幸會至於增秩豈不榮哉尚務增共以綏爾祉

皇后親姪女之子從事郎韓大用大任各循兩資

教具官某朕惟古后妃有求賢審官之志而不私謁而人主則特隆於肺腑之親夫惟后妃彌遜人主彌恩斯可觀已日



者吾后尚家廟爾等迺以諸甥亦與辛會例進兩階豈不禁哉尚朕寵章無忘忠報可

皇后親屬進武校尉韓大有將轉承信郎

教具官某日者吾后還省家廟朕循故事且酌有司之議推恩后黨而爾以諸甥亦與辛會例進一階豈不禁哉尚朕寵章無忘忠報可

皇后閣提舉官武功大夫帶御器械楊舜卿轉

察使

教具官某等方用盛時后妃永懷賢士六六僕馬俱病而不敢私調於上徒欲為觴酒勞苦之而竟不可得慨嘆而已爾朕勞官聞迺以吾后有事家廟之恩至將廢車豈不禁哉而樂之周人何其幸也尚朕寵章無忘忠報可

皇后幹辦宅從義郎張友直忠訓郎沈直各特轉一

官

教具官某等朕酌有司之議推恩后族而及其私人爾等適與幸會各進一階其尚恪恭毋替爾事可

隨龍備武郎閣門祇候兼皇后閣主管進奉索佐額

內翰林醫官太醫局教授王良佐成安郎陳翊額內

翰林醫官郭儀忠訓郎幹辦人船伊昱忠訓郎主管

文字傅昌時忠訓郎掌牋奏劉玘忠翊郎主管進奉

周良臣成忠郎掌牋奏黃允文隨龍成忠郎浙西安

撫司準備將領主管進奉趙友信成忠郎私名掌牋

奏吳衍保義郎王寧費師旦承信郎陳琪承信郎轉

運司準備差使王演承信郎魏嘉言承節郎薛拱承

節郎幹辦人船李放進武校尉私名掌牋李大受該

遇皇后歸謁家廟並特轉一官



敕具官某等日者吾后還省家廟朕循故事且酌有司之議推恩在黨而及其私人爾等各以幸會至於增秩豈不榮哉而務蕭給毋忘其事可

秉義郎韓虎胃特設閣門舍人

敕具官某朕永惟舊相有勲勞於我家而其裔孫或蒙戚里之澤越在右階無以著見唯是試之後省以發其文官之上聞以華其選尚庶幾焉爾其懋哉用俟明陟可

皇伯太師嗣秀王伯圭合得冠帔一十五道並特換封孺人賜親屬內欲將一名與故妻秦國夫人妹宋

氏封孺人

敕某氏古者醜勲賢之勞則及其私人况所尊敬自吾壽皇以元禮之者乎况其君夫人父之同產子乎以其勉思爵為命婦雖過於惠朕何愛焉可

閣門官贊合人游恭特授武德郎落閣職權發遣臨安府立馬鈐轄

敕具官某爾男爵也習於階兼之儀而不聞軍旅之事非設官之意矣第其久勞優以增秩試移賓政往治戎韜其務赴功以須器使可

起復武功大夫文州刺史興元府駐劄 御前右軍

統制兼知鳳州郭諤特轉復州團練使令再任

敕具官某朕以禁旅扞邊而擇將以撫馭之閱歲云久西顧晏然方眷其勞就進戎團之峻尚難其代故遲瓜戍之更爾其茂對新恩踐修舊績式嚴戎律兼緝郡條朕不汝忘將有明陟可

皇元沂州防禦使權王奉吳王孫祀多才磨勘轉明州觀察使



敕朕崇長宗支以綿帝繫高爵厚祿宜與共之而猶計歲課勞循次而進所以昭至公謹成憲也具官某信厚以為質瑋共以自將入不恃家人之恩而出無違於闕庭之禮况以尊屬于今幾人則徑陟廉車誰曰不可而必中有司之度積十年然後進之豈朕有所愛哉然而身無吏事之責秩比法從之崇其視匪躬盡瘁沒齒下僚者又何其幸也宜對殊渥無忝所生可

武功大夫和州防禦使權知閣門事兼客省四方館事韓侂胄特與落階官臣寮繳奏特與轉行右武大夫

夫  
敕嘉祐治平之間爾先正可謂社稷臣矣肆列聖寵嘉之施及于孫簡在戚里於焉尚主於焉納后几可以熾韓氏之門者無愛也具官某蚤以才稱荐膺器使處職上閣宣勞累年

唯彼橫行賞典所吝獨以命汝庸示殊恩一以權惠福之心一以大忠獻之後盡亦自勉庶穆羣言可

武功大夫集慶軍承宣使入內內侍省副都知張安仁除入內內侍省都知武功大夫祁州團練使入內內侍省押班李若正除入內內侍省副都知

教具官某朕嘗稽之周制內宰隸於天官夫古道誠未易復也至於建隆舊章尚有宣徽院之籍今亦廢矣而別為地司則為之長者顧不當謹擇其人乎是用命爾以肅禁中蓋親近之久識察之詳矣其益靖共以身率屬毋使外廷謂汝不稱可

武功大夫和州防禦使帶御器械于惟簡武功大夫明州觀察使帶御器械楊舜並除入內內侍省押班



教具官某自宣徽院之籍廢而北司之長蓋難其人朕既差擇之矣則參伍其間以相內治苟不有以自異於輩行而識風指謹憲度者皆不在此選也然則爾名在內人之數蓋亦思報稱者哉可

張祐正係隨龍祇應勤勞特補承信郎

教某日第攀附之勞而偶遺汝蓋累年于此矣爰詔有司授之切官以見朕懷不忘時昔可

武節郎御前祇應鄭孝友應奉有勞特轉一官

教具官某服勞左右雖無顯庸聞日進官亦國之舊可

殿前指揮使左班年代上名劉成等十五人授備武

郎許元等三人授訓武郎御龍直上名方正等三人

授忠訓郎殿前指揮使左右班守闕行門將禁十三

人授從義郎東第一班上名莫勝等四人授承信郎

散直上名孟端等七人授承信郎

教某等饗衛士而遣之古也而命以官則彌恩矣往祇吏職毋替忠勞可

皇弟右監門衛大將軍復州團練使多助皇弟右監

門衛大將軍成州團練使多能實及一十年並該磨

勳轉防禦使

教具官某等朕崇長宗支以綿帝繫而猶計歲課勞循次而進所以招至公謹成憲也以爾靖共簡在近屬眷焉增秩誰曰不宜而須暇十年以中有司之度豈顧有所愛哉以此風厲則為士者勸矣可

入內內侍省東頭供奉官降授寄資武功大夫遙郡

刺史霍汝翼轉歸吏部除帶御器械

教具官某自以諸司使改今寄祿官而內侍與戎行雜矣然



而名不在銓曹之籍則猶非秩官是則異焉耳轉而屬銓斯為  
罷渥爾其敬哉母曰序進可

招箭班殿侍嘗彥澤在班及十五年補承節郎仍舊  
存留在班祇應

教具官某方罷遣衛士而次第官使之爾以藝成令祇舊次  
宜益矜舊以須後思可

瀘州軍變守臣張孝芳被害特贈三官與兩子恩澤  
教具官 朕觀春秋書盜殺某人夫謂之盜則非死者之罪  
矣蓋喟然歎曰士大夫或死於不幸而無所歸咎者焉則其  
所遭之變非必有以取之此仁君之所務白也國家閑暇士  
馬飽逸受命分關尊重難危而爾曾無咎端獨罹不測之禍  
夷攷其治皆率故常則盜起帳下非春秋之所不罪者歟雖  
然世無叛兵久矣庸人為將高枕有餘爾以名流顧至於此

極典之隆豈但汝哀亦以使繼今者之知懼焉可

瀘州被害官兵故節度推官杜美贈兩資與一子下  
州文學故忠訓郎瀘州駐泊兵馬監押安彥斌贈三  
官與一子承信郎故下班祇應潼川府鈐轄司指使  
雷世忠贈承信郎

教具官某等苟能効死於其長上皆忠孝之徒也瀘盜之興  
爾等義不顧身各死於帥極典之厚朕豈有所愛哉可

儒林郎前瀘州安撫司幹官郭仲傳失覺察本廳虞  
候張信為亂首亂作復與賊宴飲相為賓主特降三  
資放罪

教具官某帥死于亂卒而爾為屬顧欲以卑調自全可乎削  
之二階尚用中典繼今有耻亦豈汝棄可

太史局測驗渾儀刻漏所學生周奕特補挈壺正



教其今官類非古稱謂而擊壺氏見於周官爾以諸生馴致於此亦宜知所職矣可

脩武郎閣門省班祗候霍寬夫供職實及二年與落看班二字

職具官其課其年勞正其名稱非徒以叙遷也由是而釋煩辱之事則宜知自貴重矣可

部侍郎倪思訪脩

至尊壽皇聖帝聖政特轉一官

教昔者仲尼序書斷自二典以為堯舜揖遜之美後世弗可及矣矧惟我家父作子述不待倦勤親相授受蓋視帝者有光焉則聖政之作豈不足以匹休虞書哉具官某以折衷六藝之學發明心傳以同風三代之文揚厲治効作宋一藝垂之無窮及此奏篇朕為之序日上慈宸壽皇嘉焉藉使仲

尼在宜如何表異之而有司以故事第賞爰進一官此朕之所甚不愛也可

祕書省著作郎黃由沈有開著作佐郎李唐卿王容

太常丞兼國史日曆所編類聖政檢討官章顯

將作少監黃艾並該脩進

至尊壽皇聖帝聖政內黃艾係經脩不經進各特轉

一官

教具官其等昔者仲尼序書斷自二典以為堯舜揖遜之美後世弗可及矣矧惟我家父作子述不待倦勤親相授受蓋視帝者有光焉則聖政之作豈不足以匹休虞書哉爾等各以名儒載筆東觀作宋一藝垂之無窮及此奏篇朕為之序日上慈宸壽皇嘉焉藉使仲尼在宜如何表異之而有司以故事第賞爰進一官此朕之所甚不愛也可



承信郎監潭州南嶽廟徐靖忠訓郎祕書省書庫官  
威端友訓武郎監祕書省門梁周弼翊郎趙章該進  
至尊壽皇聖帝聖政各轉一官

敕具官某皆賞典也而他以待煩辱之勞至以隸書局進官  
則謂寵夫爾尚勉思無忘忠報可

武功大夫降授昌州刺史帶御器械霍汝翼該進

至尊壽皇聖帝聖政特轉成州團練使

敕具官某鈗槩之勞鑿學士大夫力也而無人乎其間則安  
能關乙夜之覽今也奏牘來上俞音不遲慈庭有擇冊府政  
觀是誰之助歟則以爾靖恭實與執事通達中外其勞實多  
天以文字得官皆德賞也進之遙刺孰曰不可其尚勉思以  
稱殊渥可

宗正少卿鄭汝諧奉使回侍轉一官

敕具官某爾以老師宿儒銜命萬里俯隣好於北庭縉紳往  
徃憫勞汝矣朕觀春秋使騁之際楚人欲傲晉叔向以其所  
不知而不能晉人亦曰鄭子產博物君子也而皆異其禮有  
以大國而微老師宿儒專對四方非所以令遠人見也迨茲  
歸報重焉無闕而書勞進秩但循故事豈朕所以相勞苦之  
意哉爾其少休嗣有寵數可

閤門舍人兼皇子嘉王府內知客譙令雍奉使回

侍轉一官

敕具官某擯上閤之儀聯宋邸之事皆華選也爾以趣操文  
藻至於共二可謂吾親臣矣是用命爾介于霄使銜命萬里  
隋歲聘於北庭迨茲歸報重焉無闕則朕所以相勞苦之意  
何但循故事增秩哉有亡論用朕不汝忘可

奉使親屬一員淮東安撫司幹辦公事譙令憲准借



差遣一員新監明州鹽軍酒庫黃仁裕書狀官一員  
新明州昌國縣主簿楊正臣指使將仕郎葉時中將  
仕郎鄭知等回程各轉一官

敕具官某等凡出疆者有賞所以勞苦之也爾隸使事與  
隸使追茲歸報書勞進秩蓋國舊章朕豈汝吝可

閣門宣贊舍人宋克俊夏允言閣門祇候蔡唐知  
處恭並該應舉人使十次賞各轉一官

敕具官某等贊儀上閣能與聘客周旋十不失一亦既勞矣  
課効增秩蓋國舊章尚益靖共以頌器使可

浙江潮神順濟廟善利侯祈禱感應特加忠靖二字  
敕某神朕固不為祕祠專鄉其福也至四方長吏有為吾民  
請曰某山川之神能惠其境中則褒崇之典朕靡愛焉以庶  
幾古蜡百神之義矧惟濤江近在案內而有司以報禮未稱

將侈大之用錫美名以從民欲神尚終惠使世世享可

素州仰山神特加父母妃施子婦封號

敕某神等朕固不為祕祠專鄉其福也至四方長吏有為吾  
民請曰某山川之神能惠其境中則褒崇之典朕靡愛焉以  
庶幾古蜡百神之義惟仰山之神禮以王祀而自江以西猶  
未懋滿是用推本父母施及子婦或隆品秩或衍稱號朕所  
以寵嘉神貺以從民欲者如何哉尚終惠之俾世世享可

知平江府沈樸奏五龍靈濟廟乞加封第一位龍

王封東靈侯第二位龍王封西侯第三位龍王封中  
侯第四位龍王封南平侯第五位龍王北寧侯

敕某神等朕雖不令祠官祝釐專鄉獨美至四方長吏有為  
吾民請曰某山川之神能惠於其方則褒崇之典朕靡愛焉  
以庶幾古蜡百神之義矧惟五龍以時節雨暘功著近甸雖



民二千石雅不言機祥而具道所以然之故文詞爛焉爰錫命書秩以侯爵則所以寵嘉神貺以從民欲者何如哉尚終思之俾世世享可

懷安軍金堂縣進士黎崇禮年一百三歲遇大禮恩特補迪功郎致仕

教某昔在元祐合祭于園丘之歲而汝以生於今五朝矣朕方奉觴兩宮為萬歲壽迺如高年甚心羨之爰因郊養登諸仕版以見吾貴老近親之意且以教天下之孝也可

翰林醫愈充 重華宮擺鋪軍兵醫治兼臨安府駐

泊者醫邢守中到官及二年轉額外翰林醫痊

教具官某天官之屬六十而醫命士二十有八人周家之重醫也如此再歲無失爰進一官此又吾家法也往服明恩毋怠爾事可

止齋先生文集卷之十一

止齋先生文集卷之十二

外制

正議大夫守給事中兼侍講九奏除禮部尚書兼侍

讀四年正月十一日 冊書三月二十

教方朕在東宮時嘉與僚友切磋經誼緝熙光明肆以菲躬託于兆人之上克奉詒謀庶幾寡過永懷三益宜如之何具官某博極群書折衷六藝凡與我言者於今不忘也獨勞瑣闈位之春官進讀路門以竟餘論昔者甘盤輔高宗於舊勞之時而無與於中興納誨之選至漢二蹕同傳太子而亦不在初元疇功之詔我有故人始終典學視昔蓋有光焉爾其輔養精神陳古以誠今惟母以謝事之年而有遐心則朕以擇可

朝散郎試中書舍人兼皇子嘉王府翊善黃裳除給



事 中 兼 侍 講 四 年 正 月 十 日 兼 侍 講 二 日 謝 絕 行 三 月 二

敕朕有元子出就外傳數求其人蓋累年於此矣晚得三益  
聰敏日聞間嘗侍燕筵容能道二南之化朕嘉其勞圖以自  
近具官某習先聖之術而於當世之務尤與吾兒切磋言  
之者皆實學也是用擢之瑣闥勸講路門冀發其蘊并以  
告朕昔四皓調護太子而不屈於高帝李泌以布衣交肅宗  
而不能安其身於君側爾以西州之彦出入官邸為父言慈  
馮子言孝是不謂之遭時乎尚其殫竭以報簡知可

降授朝散郎許及之前任淮東轉運判官不覺察

錢隆一官滿一期復朝請郎

勅某官曰若淮錢多效葉不以道有受其咎者矣爾其以同  
過之仁而不言上亦從鑄秩非所謂吏議乎閱日既久宜還  
其初可

忠翊郎前韶州兵馬監押周昇在任不法降成忠郎  
敕具官某爾為兵官而州家以佚繫囚未諭雖會恩不汝貸  
也其鑄一階以警慢事可

文林郎階州將利縣令蘭森改初驗因傷身死人杜  
十四作凍餓身死失出犯公罪答該赦取旨特降

資

敕具官某吏與吾民親莫如今爾尚不知其寃死也而以為  
道瑾曾謂與吾民親乎其鑄一階母以恩免可

保義郎李珙家遺火燒民屋四百餘間有司自承以  
屋直計賊坐罪得旨宣諭依條聽贖臣僚上言特

降一官

敕具官某傳春秋者有人火之說則無所歸咎之辭也爾不  
戒于大而禍及於閭巷將安咎乎尚爾闕略其上一官可



故通直郎趙公廣昨知饒州因旱歉民流臣察奏遣  
兩宮勒停男老侯訴寃特追復承議郎

敕具官某左右諸大夫之言朕知其不如國人也爾守番中  
遭歲不淑能有惻隱之實而不為文具而達于朝聽者皆反  
繆言者不置麗于佚罰而爾既賫恨於地下今觀闔郡連歲  
累牘哭汝甚哀蓋棺論定莫公於此朕為憫然盡還舊官不  
但慰汝亦以勸耒耜者之勤民也可

江西運副鄭汝諧奏奉議郎知袁州黃助丁母憂不  
肯離任倍支棺槨喪服官錢等候服闋口降一官不  
得與親民差遣

敕具官某爾嘗將母以就二千石之養垂及滿歲竟以喪歸  
漕臣見劾侵紊郡計姑鑄一秩俾務省循尚蓋前愆朕豈  
棄可

奉節郎舒貽軍指使潘撫權淮河監渡不識降一官  
放罷

敕具官某邊禁之嚴而弛於汝免官鑄秩以警後永邦憲有  
常非我佚罰可

淮東運使趙師畢奏脩武郎張世榮管押歲弊公路  
恣橫生事降兩官送吏部與合 入差遣

敕具官某發弊於邊事關遠聽紛譁不靖使者有言闕略弗  
懲入將是傲其貶兩秩且屬銓曹庶使邊臣繼今知懼可

湖北提刑張垓奏承議郎常德府通判趙善亮在任  
貪婪不法降一官放罷

敕具官某部使者所治且有良二千石焉爾丞郡顧不以治  
行聞而速官謗非朕所以獎用屬籍之意矣其貶一秩免所  
居官繼今有耻亦免汝棄可



知成都府立密奏奉議郎知成都府郫縣郭公墓病  
昏率請降一官放罷

教具官某夫不能勝其任矣而昏於酒黷於貨然而郡太守  
猶以兩嘗有鄉曲之譽不實于理黜秩免官吾亦從薄罰焉  
其對隆寬益思懲艾可

睿思殿祗候寄資武功大夫入內內侍省東頭供奉  
官王師珪轉歸吏部差在京宮觀免奉朝請

教具官某自以諸司使改今寄祿官而內侍與戎行雜矣然  
而名不在銜曹之籍則猶非秩官是則異焉耳轉而屬給斯  
為寵渥閱勞朝謁祿以真祠爾其敬哉母曰序進可

武功大夫祁州團練使入內內侍省副都知李彥正  
武功大夫明州觀察使入內內侍省押班楊舜卿職  
事不謹各降一官

教具官某等朕惟周制內宰掌王內之政令會其屬之功事  
而賞罰之今內宰不設而爾等不虔于事實于宮中之罰其  
上一官應古經誼繼今有俊亦豈終奪可

李彥正楊舜卿復

教具官某宥過無六况其細者乎爾以服勞不虔嘗麗于罰  
蓋八柄所以馭過者閱日滋久俾還舊官則予恩茂矣其益  
靖共以圖報稱可

入內內侍省副都知李彥正除入內內侍省都知入  
內內侍省押班楊舜卿除入內內侍省副都知

教具官某昔在周制內宰以中大夫為之而隸天官說者以  
為禁省之祕不宜屬外廷而本朝爰初比司之長就擇明習  
靖共可以率屬者以董正之官最貴近亦不可不重其選矣  
爾自革中進在四人之數曾未踰日祇贊內治進之長官楊舜



卿六進亞長官委寄彌重其益處匪懈以報殊渥毋使外廷謂汝不稱可

親衛大夫清遠軍承宣使提舉佑神觀林億年除入內內侍省押班

教自宣徽院之籍廢而此司之長蓋難其人朕既差擇之矣則參伍其間以弭內治非識風指謹憲度者皆不在此選也具官某服勞禁近見謂老成茲用命汝秩在四人之數欲俾其屬於內肅給於外靖共則爾責重矣蓋亦思報稱者哉可呈兄故吳王府奉利州觀察使多才上遺表妻令人高氏特封碩人

教具位某氏朕所以賞爾夫於幽壤有加禮矣而何愛於疏封爾使居往皆寵光焉以塞其悲可  
多才上遺表親弟二人 此換南班訓武郎多藝修

武郎多見並特授太子右監門率府率

教具官某等朕以諸衛處宗室子俾日奉朝請非苟示私也以爾多才身後之請及其冲季惻然重違之而並命爾其務靖共以稱德意可

皇叔祖右千牛衛將軍不佞磨勘轉右監門衛大將軍

教具官某等朕考周官凡衛王官者皆同姓也國朝簡宗英實之衆列之尹蓋循周制屬意深矣惟爾叔祖簡在衛中歷年彌長勞績兼茂進長禁闥職守益嚴欽哉無違以稱明朕

皇叔祖太子右監門率府率不佞持授千牛衛將軍

教具官某以階官易環衛率視其秩日者有司故貶損爾今撤朕聞始仍舊貫雖曰緒正亦以示恩其尚恪恭稱此密察



可

武功大夫權主管侍衛馬軍司公事張師顏落權字  
教具官某朕以金陵形勢襟帶江淮轍吾騎衛布之屯所且  
以壯留輪馬則統馭之才厥選艱矣爾以名將往訓群騶方  
當無事士馬飽逸觀者咸謂可以即戎紆懷武備於風駟鐵  
於雅重攻或庶幾焉翳爾之力肆用命爾自攝為真班秩益  
崇寄任深重其尚加懋以究爾功俾周秦之詩得以專美則  
予汝嘉可

皇叔祖武德郎主管台州崇道觀不諛待換右監門  
衛大將軍

勅具官某朕攷周官凡衛王官者皆同姓也 國朝亦簡宗  
英實之環列之戶蓋循周制屬青深矣惟爾叔祖行尊德備  
今在選中應于經誼宜率典常作宋恭先有馮有翼則繁汝

賴可

昭憲皇后親姪孫杜士實特補承信郎

敕某朕惟 藝祖之子孫自吾 壽皇篤叙之恩備矣而於  
母黨顧無世祿宣昌陵之意乎取之白丁授以右職爾其永  
懷無忝所自可

右丞相葛邲初拜贈三代封妻四拜三

曾祖朝奉郎致仕贈太師謚清孝追封魏國公書思  
封魯國公

敕朕覽周誥至命君牙為大司徒實 冢宰是謂股肱而推  
本乃祖世篤忠正之美蓋有感焉維今大臣相我孝治經文  
緯武海內晏然則亦惟其先德之休足以薰後可無褒崇以  
應經祖具官某 躬行對於古人鄉譽高於月旦方其登仕  
亦既有聞而以其親掛冠再調筦庫以此終身僅通閩籍法



不應謚朝廷異焉易名清孝足以發明其人矣燕及曾孫爰  
司宰事則所以推本其美朕敢忘周道乎進封大邦莫如曲  
阜尚食其報永綏爾神可

曾祖母魏國夫人侍其氏贈冀國夫人

敕周之盛至於既醉極矣其卒章曰君子萬年景命有僕其  
僕維何釐爾女士釐爾女士從以孫子言周之群臣皆有士  
行之女以為之妃使生子孫足以傳世蓋天意也具官某故  
曾祖母具位某氏作配君子行修於家覃及曾孫迺生者指  
考其世次亦足以知吾祖宗盛時天意攸屬而豈一日之積一  
門之私哉假使當周之世必從夫爵侑食五廟然則胙以大  
國秩之小君雖古未有亦可以義起禮矣可

祖宣奉大夫顯謨閣待制致仕丹陽郡開國公贈大  
師謚文康進封楚國公勝仲封齊國公

敕朕既本之六藝大啓土宇以宏貴葛氏之祧則嗣有令聞  
遠事兩朝申錫名邦亦禮之稱具官某故祖具官某朕某家  
聲踐備累世濟以力學連由三科然而名滿天下而位不過  
從班文字行於方來而身不究遠業惟是一絰之教被于聞  
孫蔚為名臣間我兩社則劬躬之報可無異恩維此管丘太  
公舊宅是用即命以為新封對我寵靈以昌爾祚可

祖母楚國夫人張氏贈夏國夫人

敕朕方廣念祖烈匹休於周假以溢我而收得賢之福則所  
以尊入其家以答天恩豈鶴有所愛哉具官某故祖母具位  
某氏夙以懿行來嬪名家儀于前人以詔婦子亦既再世燁  
然有聞而未艾之祥施于今相詩不云子執之榛栗綺桐梓  
漆爰伐琴瑟種德彌遠暨年彌長豈皆身親見之乎報本  
酬勞式至今日大邦美以慰永懷非以為生蓋禮之稱可



父朝議大夫致仕贈太師許國公立方封越國公  
教王室百年之間公僕行相故家希不失者有以文墨論議  
綿及三葉是謂世臣固狀之以寵嘉矧于宗工尊為禰廟者  
乎具官某故父具官某 標度許然聲華藉其父未脫藁往二  
誦之一時英游莫敢輩行紹興之季歸為從臣蓋其行藏皆  
可蹤跡用而不盡士論情焉且集善聲發於賢嗣凡所著見  
孰非典刑爰侈舊封建邦於越以學教忠之報以伸追遠之  
懷可

母雍國夫人樊氏贈陳國夫人

教為吾股肱之臣則上自三世皆褒大之而況於其母乎御  
不及百兩養不及萬鍾也而無以慰滿其罔極之恩亦何以  
責移忠之報哉具官某故母具位某氏承沐襲美發育自躬  
恩斯勸斯鞠我良弼雖及晏歲逮事舅姑且莫敬共至忘櫛  
頰是足以成其子之令德矣改疏上國之封以世世配于禘  
廟而今而後庶幾吾大臣之不廢慕我也可

故妻蜀郡夫人沈氏贈成國夫人

初夫人起家以致爵位風人懼焉迺若克相夫子至於登庸  
嘗與之同隱憂矣而不同休顯此則又禮經之所悼嗟也具  
官某故妻具位某氏女德配於珩璜婦功著於蘋藻胡不偕  
若以湏美成朕惟吾相禠於祔姑之室而副笄之服弗被翟  
帚之車弗乘也非有追寵何以慰之乃闢新封以貴幽安可  
妻魯郡夫人王氏封信國夫人

初永惟二南大夫勞於王事而勉之以正勸之以義者皆其  
家室也矧吾輔臣孤立一意佐佑乃辟是不日警戒相成之  
助歟具官某妻具位某氏自繼元配德音不瑕既有芳聲進  
界祖妣亦有雜佩施及姻佐我名臣迄登三事聞譽日廣績



用山崇則與夫汝水之墳南山之側遭世不淑動心忍性者可同年而語乎冠於命婦為君夫人我有茂恩宜不汝吝可

知樞密院事胡晉臣初除贈三代封妻  
曾祖贈太子太保修已贈少保  
四年三月

勅昔周宣中興將相皆天下之選矣爰命皇父以整六師而推本所以實南仲大祖之後爰作常武之詩朕喜慕焉維今本兵得我碩輔則其宗祧可無衰崇以應經誼具官某故曾祖具官某躬行對于古人德譽高於輩行而懷道不試士論惜之夫屈於名者享其實不發乎其身者遺其後是宜燕及曾孫蔚為名臣又陪國論晉長樞庭則追錄其積行之勤遠幸其種德之報朕敢忘常武之詩乎陞班亞保以寧其神非以為生蓋禮之稱可

曾祖母齊陽郡夫人黃氏贈崇國夫人東來郡夫人

八張氏贈安南國夫人

敕周之盛至於既醉極矣其卒章曰君子萬年景命有僕其僕維何釐爾女士釐爾女士從以孫子言周之群臣皆有士行之女以為之妃使生子孫足以傳世蓋天意也具官某故曾祖母具位某氏作配君子行脩於家單及曾孫迺生者皆考其世次亦足以知吾祖宗盛時天意攸屬而豈一日之積一門之私哉假使當周之世必從夫爵侑食五廟然則胙以大國秩之小君雖古未有可以義起禮矣可

祖贈太子太傅燮贈少傅

敕朕既本之六藝不愛高爵以崇報胡氏之祧則嗣有令德休于後昆並命為孤亦禮之稱具官某故祖具官某當天下之清得幽人之履世無孝廉之科而不偕於計吏居無朝市之交而不聞於上國天命弗僭為之生孫蚤為聞人遂專樞



竟是不謂之勅躬盡後者乎申錫命書班於次傳豈唯發潛亦勸來者可

祖母平原郡夫人王氏贈水國夫人

敕朕方寅念祖烈匹休於周假以溢我而收得賢之福則所以尊大其家以卷天既豈顧有所愛哉具官某故祖母具位某氏夙以懿行來嬪名家儀于前人以詔婦子爰集慶善施于聞孫詩不云乎藝之標栗椅桐梓漆爰伐豈種德彌遠歷年彌長豈必皆身親見之手報本疇勞式至今日大邦羨號於禮為宜可

父奉議郎致仕贈太子太師宗贈少師

勅自蜀平至今二百餘年蓋西土無遺賢矣而尚有潛德三世不逢詩不云乎何其久也必有以也具官某故父具官某行著而晦於名才豐而賡于位乾道之際有子燁然諸老先

生見謂公輔吾 壽皇駸駸嚮用矣而方考槃阿澗水未沸 緩不以鼎來之養而易燕居之福匪棘其欲卒為帝師作所謂有道者乎然而生則遂循墻之志沒則極告第之榮吾於大臣之親亦質之詩書無愧矣可

母通義郡夫人鮮于氏贈信國夫人和政郡夫人蘇

氏贈和國夫人文安郡夫人王氏贈惠國夫人

敕為吾大臣則上自三世皆寵嘉之而况於其母乎御不及 日兩養不及萬鍾也而無以慰滿其罔極之恩亦何以責移 忠之報哉具官某故母具位某氏承休襲義發育自躬恩斯 勤斯鞠我良弼蓋副笄之飾翟茀之華一朝疇之不以為泰 朕惟樞輔依然永懷是用疏以上國之封以世世配於禰廟 而今而後庶幾吾大臣之不廢黎莪也可

妻大寧郡夫人康氏封安定郡夫人



敕永惟二南大夫勞於王事而勉之以正勸之以義者皆其  
室家也矧吾輔臣孤立一意佐佑乃辟是不曰警戒相成之  
助歟具官某妻具位某氏酒醪之所羞雜佩之所贈皆天下  
賢傑也爰相夫子至於登庸經文緯武績用甚茂則與夫汝  
水之墳南山之側遭世不淑動心忍性者可同年而語乎冠  
於命婦為若夫人我有異恩宜不汝吝可

迪功郎秘書省正字蔡幼學該脩進  
至尊壽皇聖帝會要轉一官

敕具官某載筆東觀迄於成書序進一階可謂德賞益修  
繫以昌爾文二典三謨亦其選也可

忠訓郎武學博士李興時知驪州七月十一日

敕具官某簡在右學諸生咸曰賢哉吾博士也前歲宜遷官  
而自詭治民將以其淑人者施之行事融在嶺表嘗建旌鉞

而荆湖之與鄰視旁郡為善地爰以付汝是謂異數尚其懋  
哉以踐爾言可

高文虎除將作監丞

敕具官某朕旁招俊彥布列周行德進言揚如恐不及矧子  
大史氏之舊引疾居家十有四年昔病今愈予環可後乎爾  
博學為志承伯父之傳網羅舊聞述史遷之緒採之公論會  
曰汝賢再轉為丞尚居繕監職務清簡可以卒汗青之業毋  
以匠為嫌也可

武學諭范仲士除武學博士脩武郎黃裳然除武學  
諭七月二日

敕具官某等國家設武科以取士有周道焉所以貫書之計  
息說劔搢笏冕衣裳在西學則皆俊游也矧若爾仲士爾  
然人所亟得者乎分以橫經之席從以滿戶之履雖甚寵異



禮曰不宜可

止齋先生文集卷之十二

止齋先生文集卷之十三

外制

和州防禦使殿前副指揮使郭杲除宜州觀察使

教古者六軍皆以卿將元戎十乘有瑤葱珎二雅誦之庸示  
光寵矧我中權可無異數具官某鷹揚之勇福奏之謀山西  
將家今終一二疇勞屯所晉長周廬訓我群騁壯我中壘累  
歲於此士聽無譁日者貝冑三十來閱庭內舍矢如破可以  
即戎朕圖爾功宜及懋賞枚數男爵峻極廉車禮均從班視  
古卿士是用命汝蓋周舊章光對明恩益思忠報無使行將  
專羨車攻無使止帛遺恨行父則予以擇僉曰汝諧可

武略大夫侍衛步軍都虞候兼權侍衛馬軍司職事

閻仲特轉右武大夫忠州刺史

勅日者朕重冬狩之役又不欲乏武事也而為簡之師試諸



廷內於環列得師焉於步旅又得帥焉皆可以即戎朕甚嘉之具官某久於行陣積有戰多枚數壯士莫與儔伍解胸山之圍殿符離之返至今言之令人於奮須自遠選在戎師徒百夫千夫各習其教往往營壘廬次之間無置虛塵也於是閱也介冑堅好旌麾光明生作進退戲中尺度朕惟勇爵以橫行為右階之最以刺郡為遙領之始悉不汝吝用賞懋刃其對陰恩益殫忠力可

閣門者班趙弼奏祖故寧遠軍節度使侍衛馬軍都指揮使贈大尉趙搏累遇郊祀登極未曾陳乞加贈特贈開府儀司三司

敕朕永懷將闕克勤王家宜勞實多贈典有闕具官某忠於許國勇不顧身能以衛社稷之心効於死封疆之力戰自東髮觀者汗額日者欲澄冗員嘗第元從閱實數千人之衆定

為十三處之功爾獨最聞朕尤嘉煥然論報自昔維峻極於武階而訟言有孫尚少虧於褒律是用申命幽壤親儀上台以昭我不可賞之功以成爾無遺恨之美抑使介士奮於戎行可

朝散大夫權刑部尚書京鐔兼侍講

勅朕與賢士大夫切磋經誼之日久矣而今加意於春秋春秋固為夷夏作也蓋聞在漢或申復讎之義或庶幾止戈之武而皆有大力號稱七制斷之經意孰得孰失朕將安所取此而誰與茂明之也具官某簡在法從蔚為名臣修聘北庭非禮勿聽往釐西事無言不酬斯可謂据古而通今者矣進之路朝重席以待其為朕深探遺經之指與漢二君行事法佐取舍爾信不為章句學者而朕顧不能專所問無往其哉以副延好可



太中大夫權尚書吏部侍郎沈揆兼侍講  
敕朕與賢士大夫切嗟經詛之日久矣而今加意於春養  
秋固為夷夏作也蓋聞在漢或申復讎之義或庶幾止戈之  
武而皆有大功號稱七制斷之經意孰得孰失朕將安所取  
此而誰與茂明之也具官某紹興諸生速事高廟純道博學  
見知慈庭於今士林鮮矣華行而况嘗與朕游舊乎進之路  
朝重席以待其為朕深探遺經之指與漢二君行事以佐取  
舍爾信不為章句學者而朕顧不能算所聞歟雖慙哉以副  
延守可

朝請郎右正言黃艾兼侍講 八月二十

敕具官某諫臣朕所甚嘉與也過者封囊朝奏而夕不下則  
言者輒不自得豈朕意哉勸講詞自有司未論庸命汝艾切  
嗟經術晉陪從班無所降殺宜惟以爾聞見博洽宜在選中

亦使人人曉然知朕嘉與之意則繼此盡言不諱矣尚願  
心以副延守可

湖南提刑孫逢吉奏邵州獄囚死者二十餘人守臣  
湖澄持展二年磨勘

敕昔在三朝每歲盛夏以一札賜郡縣長吏為奸獄丁寧也自長  
吏不奉此詔而吾民瘐死者滋衆爾某守邵亦以獄囚多死  
見察於部使者母乃非朕寄元元之意乎貶損生勞以示薄  
罰繼此領州無怠息事可

文林郎邵州錄事參軍柴璿備職邵州司理參軍  
李邠獄囚多死各特降一資

敕具官某爾為獄官而不省囚疾苦至多瘐死非所謂士師  
不能治士者歟其鑄一階以警怠事可

大尉定江軍節度使興州駐劄御前諸軍都統制兼



知興州吳挺守本官致仕

敕圖任世臣盡護蜀將縱跡十萬不從中覆蓋五六十年於此矣此意安在哉而欲致其事耶具官某性有忠勇之資學有齟銛之素寬我西顧賢於長城假以數年庶底丕績而一旦以疾來諗願上夫將軍印綬此朕所以屏奏不省也雖然誦詩至於勤懃遠詠歎辛苦則古者遣將數日即休未有以獨賢久勞若爾然者朕豈得不動於心乎姑徇忱辭使自休養若屬有疆場之事強為朕起何以報我爾其勿忘可

故太尉定江軍節度使興州駐劄御前諸軍都統制兼知興州致仕吳挺特贈少保

敕朕誕膺聖緒渴想賢勞方分託重之權尚阻勞還之禮眷惟三世每興而竭既金之懷胡不百年遽有東晉地紳之恨可為靈俾何以追崇具官某為今价藩視古名將本之以鷹

揚之勇濟之以輻輳之才越在江源而不忘宗海之心既安蜀道而常為得隴之計是用倚以大事付之全師永惟王室之中興皆有世臣而後濟繼周復古則召公是倡之功維漢御天則耿氏獨隆之力期爾晏歲對於昔人曾諗疾之亡何而告哀之已至朕方深念莫起於九原國有常儀率加之二等肆頒渙渥以慰沉寘晉倍亞保之班配食先王之廟意有以勇爵至於聯左棘之華雖云愍章足以示前茅之勳可持朕前武功大夫邠州團練使吳曦特授濠州團練使起復

敕具官某有金革之事測年之喪無辭自伯禽以來未之有改而况爾曠世為將乎移孝為忠朕所以徂起汝也又况蜀師十萬聽命爾家西陲晏然于今五紀方圖前列宜及後人則朕爾於寄祿之階授爾以戎練之任豈以為利其是固



辭可

提舉江州太平興國宮郭棣授利州觀察使致仕  
救憫勞將帥界以真祠尚復抗章勇於忘錄直遠雅心  
歸休爰進崇階以勸廉退具官某奮自將種卓有俊  
赫門晉尹環列累歲於此六軍不譁方篤邦交久無  
士雖倍戰功不多然中權此然大敵知懼繫卿之力  
心所冀壯猷不忘王室胡為解組遽此垂車豈非以  
者末路之難而三世功名道家所忌乎勉從忱請良  
尚服寵榮益綏壽祉可

故利州觀察使致仕郭棣特贈寧遠軍承宣使

救聽垂車之請亦既永嘆聞易箚之言可勝遐想宜  
以疇舊勞具官某自束髮之初有累尸之志方其  
威沙漠之間竟爾收聲當偃伯靈臺之後然而我  
周畿兵我有千虛如漢中壘舉以副托究其設施歷  
課効為最往者以厭直之請踐更于邊雖各州符亦  
反即祠館從其憚煩曾鳴劍之未甬何挂冠之已  
感德非忘杖杜之詩今顧不然乃是迫桑榆之景  
為之盡傷爰錫使名視唐留務以華身後蓋國舊  
承用自寬慰可

耶律迨哩致仕

教有能厭擅羗之習蹈不測來歸我可謂壯士矣  
欲自便乎具官某耻事朔庭義不攜漢觀光中國  
盡壽皇之所寵嘉而朕待之勿替者也夫鳴劍之  
而挂冠之請已决豈其以兩國方歡賈勇不售將  
罷職乎抑膂力既憊自視非昔人而不復感驟然  
疾病耶重違忱請聽致爾事若以疾辭則豈庸釋可



耶律适哩贈官

勅挂冠有請良則余衷華嶺有恩蓋綏爾後具官某以幽燕  
任俠之氣懷江漢朝宗之心萬里來歸其欲宣威於沙漠而  
兩君為好適當偃伯於靈臺竟爾收聲至於賞恨蓋聞華夷  
之分春秋所嚴有能擇衣冠於介鱗之間而顧執干戈於社  
稷之後者此壯志令人永懷爰疏錫命之封庸示飾終之典  
尚歆殊渥以安冥竟可

正議大夫充顯謨閣待制提舉江州太平興國宮僚  
峴磨劫轉正奉大夫

教夫循次非所以待勞能也計年非所以處法從也而有司  
以告重違舊章宜有命書且見明陟具官某以名臣之子自  
許於儒生以夕郎之官踐更於州組奉祠累歲益見靖共享  
進一官曾非特典朕不敢廢姑慰永懷可

合州赤山縣多山至道觀中妙真人祈禱感應加封

中妙靈應真人

教具其神朕雖不令祠官祝釐專鄉獨羨至四方長吏有為  
吾民請曰其山川之神能惠其一方則褒崇之與朕靡愛焉  
以庶幾古靖百神之義今蜀部使者來言爾神惠及閭閻求  
之掌故則建炎之所表章也爰錫命書申祈禱所以寵嘉  
神貺以從民欲者何如哉尚終惠之俾世世享可

潼川府中江縣靈威廟善利侯祈禱感應加封善利  
敷濟侯

教具其神朕雖不令祠官祝釐專鄉獨羨至四方長吏有為  
吾民請曰其山川之神能惠其一方則褒崇之與朕靡愛焉  
以庶幾古靖百神之義今蜀部使者來言爾神惠及閭閻  
然古祠前脩所敬吾民其嘉賴不忘也爰錫命書申祈禱



所以寵嘉神既以後民後者何如哉尚終惠之俾世世享之

盱眙軍通判

降一官

教具官某爾為通守適掌北門之管姦民犯禁而莫之禦頌  
欲歸罪於微吏可乎其鏡一移以為不事事之或可

武節大夫權發遣鄂州任世安特轉一官守任

教具官其往時三違吏不數易滿歲無虞則增秩以寵之蓋  
自建隆以來未有改也今爾乘障日有能聲爰進新階仍

舊組爾其益固吾固以記外庸杖杜衡歸之詩朕宜忘之手

可

從義郎權知恩州田祖嚴特轉一官

教具官其昔爾以婦地進秩而有司終美仍三勞之舊官旋  
焉正名以示懋賞其朕今益見寵級可

復正大夫奉國軍承宣使提舉佑神觀郭從之特轉一官

國信所任無違關特授宣政大夫

教交鄰之禮於今為重自東帶與賓客言至於几執事皆  
以覽示遠人以中國之有體也具官某昨長內庭嘗發寶幣  
竟以明習曾無忒違憐好不渝亦繁爾力請勞滿歲懋賞宗

階蓋國舊章朕宜汝各可

朝散郎守司農少卿唐體仁除太常少卿

教具官某奉常惟禮樂是司而去古浸遠放逸尚多非得博  
物洽聞學有根據者未易輕畀也爾少明經術務為有用  
曠索隱耻一物之不知總餉之久蓋已由郎者而厥大農矣  
召對雍容効忠無隱其為朕典禮樂之事雖數玉帛亦未已

尚求其本而釐正之可

朝散大夫尚書戶部員外郎趙蓋除軍器監丞

中十一月



敕具官某戎監之設本以嚴飭武備而休兵歲久繕備之職各有司存長貳亦惟摠其九而已以爾舊制之孫亮自抑其久在郎省能寡悔尤序進為長仍攝民曹往其祗敬無差二舊可

朝請大夫起居郎兼玉牒所檢討官兼權中書舍人樓鑰除中書舍人

敕書皇初策在廷之士蓋極一時之選矣朕閱名籍得為相臣者二人焉樞臣者一人焉使臣而下以聲績著見者迨不可枚數也具官某於是時嘗慨然為舉首而渴不中有司之度然至今海內士所樂道議論文章風流蘊藉則未嘗不在稱首也聞者旁招時望實之本朝爾以攝官屬筆能道朕德意與其人才美之所宜文字之上下簡書之長短皆足用勸而發言不同往往不奉吾詔仁者之勇見於封章肆用

為真詞掖除書之出國人皆曰賢詩不云乎假以溢我我其收之朕於是象 壽皇得人之福矣昔者鄭為辭命終屬國僑唐掌帝制實先韓愈爾其懋哉稱此優異可

額內翰林醫痊李九齡轉翰林醫効

敕具官某天官之屬六十而醫命士二十有八人周家之重醫也如此矧爾服勞有以自見進之二秩視周命士往服明恩毋怠爾事可

判太史局吳澤荆大聲劉孝榮周端友職事不謹各降一官敕具官某等東方未明之作挈壺氏所以刺朝廷也朕夙興待旦而五夜之漏聲不肅是誰之外咎歟各鑄一官敬共朝夕母以為星官曆翁而弗汝察也可

秀州海鹽縣陳山龍王顯濟廟神母慶善夫人加薦福字敕某神母朕既從二千石之言宏賁二子之祠維爾能與而子



共福吾民郡人推本所自而廟食之可無窮嘉申衍稱說以大慰民欲乎可

賜進士出身宣教郎趙善防係濮安懿王近屬更轉一官

教具官某策士于庭而吾屬籍有以文克列于丙科朕既異焉而問諸宗人則於濮園為近抑可嘉已申命一官以勸君子爾其懋哉務自著見可

宗子顯夫量試不中年四十以上特補承信郎

教某國家所以待屬籍至矣不得雋於進士則有量試不得雋於量試則有免試皆欲使之齒仕版習吏事也爾其勉哉以稱朕意可

量試中宗子汝弼等八十一人補官

教某等凡有司考校之科甚嚴密也而獨寬於量試宗子蓋欲

使之齒仕版習吏事稍涉於文墨而不求其備爾等盍對明恩思所以自勉哉可

合格取應宗子時信等四十二人授官第一名補承

節郎餘補承信郎

教某等有司考試之法至嚴密也而獨優於宗室子夫既闕畧以取之而授官與寒畯等則非所以示公姑屬右銓以須器使可

四川宗子師說等十人赴赴殿試不及並特補承信郎

教某等爾以宗黨越在西川嘗得雋於有司而道阻且長弗獲與親策之選置而弗錄朕心惻焉亦授以官庸示篤教爾其懋哉可

宗子師鉉量試不中依近降指揮年四十以上特補



承信郎展三年出官

教某有司考試之法至嚴密也而獨優於宗室子夫既優矣而猶不應令徒以強仕予之初官然必使為三年之淹而後筮仕用示篤叙不為苟私可

宗子汝璽對策中問全馬御題首尾各用一既湊成持降一官推恩補承信郎

教具官某策士於庭而無以對宜不在第中以爾屬籍而

不求其備始命以官亦可謂茂恩矣可  
廣東提刑李信甫奏朝奏大夫通判德慶府權去州張公蓋失陷官錢科擾民戶特降一官放罷永不得與親民差遣

教具官某嶺表以去廷遠而吏不自愛往往淪胥而為欺前

闕一秩且不得與於民社之寄昔自愛者迷且尚少懲乎可

忠訓郎趙湧在任不職南劍守臣楊祐按罷輒取伏闕妄論守臣特降一官仍押送寄居泉州拘管

教具官某爾以屬籍試吏不自貴愛而見劾於州家亦既虧吾教矣詰闕自甄復終失實錮一官俾爾省循可

四川制置立密奏承直郎知叙州慶符縣魏良心侵刻夷人又輕入夷國致殺死巡檢程仲乾降一官放罷

教具官某夷人畏靡而服威重爾為邊縣不足於斯二者而致吾疆吏於死地免官錮秩是不謂之寬典乎可

知成都府立密奏從政郎錄事參軍史定之不親蒞獄致囚自刎死降一官放罷

教具官某夫為獄掾而弗躬弗親幽枉多矣囚致於自盡特其甚較著彰彰者也免官錮秩是不謂之寬典乎可



文林郎發州浦江縣丞趙大亨不遵依提刑司差委  
推勘公事輒申任滿離任降一官

敕具官某士而不事事是欲素餐也爾方丞縣而再却憲臣  
之檄以自擇便豈非不事事歟按章來上姑鑄一秩繼今知  
懼斯可從政可

知萬州李圭奏脩職郎萬州司理參軍向紹祖獄囚  
繫死降一資放罷

敕具官某爾為獄官而不省囚疾苦至於墮指至於死而不  
以告豈非所謂士師不能治士者歟其鑄一階以警怠事可

止齋先生文集卷之十三

止齋先生文集卷之十四

外制

慈福太皇太后冊寶書冊文官中大夫知樞密院事

趙汝愚轉大中大夫

敕迺十有一月癸未日南至朕帥中宮從以婦子朝于重華

獲陪親尊上顯號於王母永惟一朝四世非常之休則亦二

三股肱克相孝治以輯威儀可無茂恩昭示褒律具官某任

而道遠經明而行備 累朝篤叙同姓然自熙寧以進士

對策而卿始以謙議冠群英自治平以儒臣本兵而卿始以

雅望位三事卓爾大雅百年而復見之扶甚嘉焉屬茲成禮

盍圖爾功維昔太任儀刑姜妣功在十亂德在二南於是周

公推本聖子作思齋之詩以歌之而仲尼定為六藝傳信萬

世朕今建事過於成王翳 曾不在周公之下請勞進秩



實應經誼噫繼自今為

陪朕歲上萬年之壽頌不

備歎可

蒙寶文官通議大夫參知政事陳騷轉通奉大夫

敕迺者具法駕以日南至朝慈福官壽皇拜于前奉安拜于後朕帥中宮從以婦子摺圭稽首奉上寶章亦惟輔臣克相鉅典可無褒律以示同休具官某直內而方外博文而約禮及見故老在紹興文獻之間對為儒宗極重華侍從之選眷言舊學簡在初潛所謂獨抱遺經能斷大事者矣嘗預機政益行所知俾予孝治度越千古蓋周頌大任而不及子孫康事之榮漢尊長樂而不備父母俱存之福洪惟我家一朝四世自有載籍未之前聞翳仰持壽壽善真美噫朕式克至于今日休宜惟兩宮將高廟亦寵嘉之序進一官匪以為報可前導禮義使并奏禮畢通議大夫同知樞密院事余

端禮轉通奉大夫

敕日奉寶冊上之慈福也乘輿所過觀者萬人夾道皆

羨於朕躬朕豈敢專也則亦有宅心知訓之臣克輯盛事可無褒寵用以示勸其官某直諒而多聞明哲而匪懈蓋退然如不勝衣而道任天下之重謙謙鞠躬而勇過孟賁矣後將替以陳誼最高晉翊鴻樞臨機必斷朕嘉賴焉迺者道亨有儀可舉肆于竣事盍畧爾功朕誦思齊之詩推尊文王本之太任於是蓋四世矣而周公始作大雅考引功德以昭前人未必逮事王母親周旋揖遜乎其間也以今况古孰與朕休如卿遭時亦曰鮮儷繼自今卿其以予萬億年對天之休將書勞進秩不一而足焉尚其懋哉可

兵部尚書羅點母太淑人繆氏遇慶典恩特封善安郡大夫人



教朕觀魯詩頌僖公之有道及其壽母於以知吾卿大夫之  
賢其母亦不可以無報禮也具官某母具位汪氏克相君子  
禮德云邁是生賢嗣為邦司直以點之議論風操過魯侯遠  
妻則爾母視魯夫人賢何如也義不貳其夫而善祥集於晚  
年教行於子而淑譽聞於斯世肆朕嘉與游錫贊書秩以小  
君號封名郡抑與魯人請命于周而後作頌者異矣尚服寵  
元以綬壽祉可

中書舍人樓鑰母太碩人汪氏遇慶典恩特封太淑

人  
教朕觀魯詩頌僖公之有道及其壽母於以知吾卿大夫之  
賢其母亦不可以無報禮也具官某母具位汪氏克相君子  
為名大夫是生賢嗣世濟其美以鑰之議論風操過魯侯遠  
甚則爾母視魯夫人賢何如也爵雖從其夫而善祥集於晚

年教行於子而令譽聞於斯世肆朕嘉與游錫贊書秩以小  
人請命于周而後作頌者異矣尚服寵光以綬壽祉可

參知政事陳騷子臧孫遇慶典恩乞進封其母

教日奉萬年之觴于朕王母嘉賴爾父爰進褒律而爾又以  
錫類之恩崇大其母膏沐之邑豈不禁哉具官某母具位某  
氏吾大臣內助也而及借老方爾父夙夜匪懈庶我庶績亦  
惟爾母整齊家事而後得以并意一鄉不懷其私則從夫之  
爵雖不以癸未詔書從事晉封名邦朕何愛焉而尤乎夫人  
獨得之也若夫可以久處約於燈火之初可以長慶樂於簪  
裾之後凡百命婦於焉取式則此異恩又足用勸可

安定郡王于濟遇慶典恩特封官

教維建隆磐石之宗澤流後裔維慈福奉觴之慶燕及高年  
兼二者以有言進一官而何吝具官其為今屬籍視官與刑



以孝恭友兄弟如周君陳以謹重率宗室如漢劉德至於試  
吏允也過人信抱負之不群况行藏之無愧比觀掌故誰其  
逮事於四朝強起襲封茲謂勲德之一老可以華國豈惟奉  
祠方欽想於率尊宜亟蒙於殊渥假如老老亡元日之詔書  
祇以親親亦盛時之恩意明揚進律晉陟承流其後對於詔  
光用承綏於眉壽可

慈福太皇太后姪淮東總領吳璉特轉一官

敕具官某等嘗得皇上皇後恭上 慈福之册親聆 慈訓勉  
之以學至今心不敢忘也而施恩外家久不予矣甚失朕意  
爰趣有司上之而兩某方饒淮師序進一秩以 太后訓朕  
之意則爾亦宜自好修以成思齊太任之美矣可

吳璉

吳璉

吳璉

吳璉

吳銓等一十二人

辦進 官 燕 祭 等 九 人 各 以 姻 緣

迫功郎前金州司戶青陽炳文年九十一遇慶典恩  
特封承務郎

敕具官某在易之晉受茲介福于其二母而朕身親見之豈  
不盛哉念慶渥將燕及人老俾爾晏歲齒于初官尚服寵榮  
益綏壽可

儒林郎御史臺副引贊官賈忱應奉

等號册寶了畢轉承直郎

敕具官某典禮行於上而澤下逮蓋廣愛之道也爾適幸會  
亦與進秩尚務肅給母愆于儀可

朝散大夫軍器少監兼實錄院檢討官兼權考功郎

官黃由除將作監兼嘉王府直講

敕具官某朕有元子愛之固深而教之惟恐不至一時宸僚



儒學之選爾以魁倫之考久儀群王之府保保正色抗論不  
回自少匪而為長蓋亦寵矣技巧精能非所以望汝也橫經  
朱邸使吾兒有直諫多聞之益是惟休哉可

武德大夫帶御器械幹辦皇城司陳守忠係

重華宮淑妃陳氏親父久在殿陛特與帶行送郡刺

史

教具官某於重華為掖庭之親於廣內為屬韃之列矧惟爾  
給濟以靖共出入兩宮而無違周旋四姓而不競爰醜勞於  
歲暮俾借重於州麾以歡庭帟以壯軒陛可

奉議郎太府寺丞曾三聘除秘書郎十二月二

教道山蓬萊圖籍鉅萬士夫仰望真有駸車羽輪之隔游其  
中者皆天下選也以爾力學自奮持論不阿憂國之心如飢  
如渴擢自外府徑登清貫益讀未見書以昌遠業且使四

秩然有序是為稱也

大理寺主簿王寧新知信陽軍州之並除太府寺丞

十二月二

敕寺監皆有丞而外府設官特詳焉蓋欲上裨版曹之調度  
下托有司之出納不可以非其人也以爾寧文辭蔚然明習  
吏道勾稽棘寺平反為多爰俾序廷以酬勞動爾崇之聲稱  
籍甚蚤登著庭出守邊方召對尤敏使還朝蹟以慰公言所  
責於儒者謂其能通世務以其所學見之事功勉哉可

朝散大夫三進之知德慶府

敕具官某爾頃以天府貳車往守武陵突不得黔已復舉  
朕心閱焉晉康雖遠實 高皇興王之地舉以授汝以觀  
汝能尚其懋哉毋替朕命可

張某知宜州



敕具官某自桂林以南之州宜為大其與蠻人隣也宜為適  
置侯國園重於他邦舉以付爾不謂之選擇而使子與尚對  
明恩無之違事可

朝散郎充顯謨閣待制兼 皇子嘉王府翊書直學

兼侍講五年正月

敕朕每歲仲春詔諸儒講路門將脩故事有日矣比覽名籍  
為之矚然昔者所進今安在耶而不為予講也具官某以六  
學之博長於勸誦嘗發明春秋之旨纏纏可聽也何意不已  
而憊勞以大夫之事但與吾兒游乎夫文帝能前席賈全於  
久不見之餘而武帝不能留汲黯於出入禁闥之日而君治  
効較然可觀爾不當起為予講耶詩不云乎素絲祝之良馬  
六之波妹者子何以告之此朕所以責望汝也可

後政郎建康府江寧縣尉趙汝言字叔信嘗為

郎

敕具官某澤宮不建士無射御之習 壽皇以為此非所  
以合文武也既策之廷中復取之園 於此皆得雋焉士亦  
艱矣俾進一階用為如吾詔者之勸可

降授朝奉郎權通判建康府徐克仁國子博士日奏  
對失儀降官特復朝散郎致仕

敕具官某闕庭之禮陵三軍者懼焉以其嚴也爾為博士長  
而進對失容至於鑄秩朕豈深咎爾耶丞郡亡何幸未致事每  
心謹畏過自刻責手俾還舊官示棄前咎則朕之遇士大夫  
明恕兼矣可

福建提刑盧彥德奏泉州同安縣尉鍾安老增強盜  
希賞本州錄事參軍從政郎鄭繼功符同結錄更不  
駁正繼功特降兩資放罷



教具官某捕盜之賞達盜舊章也此歲吏緣為欺往往傳會  
得官緝紳數以為言而重改作特以待實能為爾汝治其獄  
也不審察竟以傳會之辭上之州家士師不能治士非是之  
謂與真刑兩秩仍免居官尚務者循以蓋前答可

前提舉廣南市舶江文叔容縱押綱官移易香綱錢  
物特降一官

教具官某建隆帥司蓋長吏兼之尋以為有遺利也而專置  
使亦稍密矣爾領其事適以貢輸屬汙吏然則何賴焉削之  
一官以為不謹所使者之戒可

知建康府余端禮奏武武經郎李存道和羅淮西總領  
所未般量少欠降一官

教具官某時稜以首膺此大重也而爾不究心至見劾於帥  
爾不究心至見劾於帥

入內內侍省東頭供奉官毛居實轉歸吏部授從義  
郎

教具官某爾自謫籍得歸銓曹命之秩官往護陵寢其對息  
渥毋忘懼思苟無後愆亦豈遐棄可

新知錢塘縣趙盛婺州通判吳璫並除職事官三朔

教具官某等維昔忠獻光輔

高宗以建我家維今

太皇實佐求賢而無私謁天下誦之則以爾盛忠獻之後時  
太皇家人也靖共在位克世其美而真諸周行以勸勳  
戚不亦宜乎可

大理少卿許及之奉使回特轉一官

教具官某昔卑陶明刑能弭猾夏之患爾吾諫臣也而為大  
理稽經傳古人自不究非所謂淑問如臯陶者耶銜命北庭



且以覘國朕所為用汝也肆于歸報宜然獻忠益歷道其所更見至於禾黍而未嘗一語及僕馬之病朕聞之有感焉書勞增秩是特舊章若屬有鄰國之大事爾其選哉可

閤門舍人蔣介奉使回特一官

敕具官某使於四方孔門以為難是可以觀士矣爾以西州之彥充職上閤意象容止亶如儒素蓋其所趣尚然也屬備隣聘以爾輔行肆于歸報禮無違者書勞增秩益循舊章欲究爾能嗣有晉寵可

帶御噐械蔡必勝除知閤門事

敕具官某昔者仲尼設科可使束帶與賓客言者皆高弟也矧吾上閤四方於此乎觀禮而可不用士乎爾以諸生習孫吳對策為天下第一操履趨尚學士大夫也 壽皇嘉之駸駸朕方在潛邸每視朝輒屬意汝以為可在左右肆

我刷服首加趣召俄而銜恤迺今來歸是用命汝典我閤事夫不以寒素處私人不以學問望右列其來尚矣自我作古追復仲尼之遺意爾其懋哉以圖忠報可

朝奉大夫試尚書禮部侍郎倪思薦舉不當降一官  
滿一期叙復朝散大夫

敕朕惟聽言信行雖高第不保其終身觀過知仁則寬朝宜諒其本意爰棄前咎俾復故官具官某蔚為國華簡在法從久居臺閣蓋習於推轂之風樂道縉紳亦恐有積新之恨云胡吏議及此上聞迺不知猾吏之為而徒錄名臣之後或者愛博至於言私雖薄示懲章豈遽忘於善類思皇多士朕所以舍舊而圖新求備一人爾毋為矯枉而過直可

降授通議大夫 顯謨閣待制提舉江州太平興國  
官陳峴薦舉不當降一官滿一期叙復通奉大夫



敕朕惟聽言信行雖高第不保其終身觀過知仁則寬朝宜諒其本意爰及改歲俾還故官具官某屢與名藩久待後蒙以公卿大夫之後雅有振援則門生故吏之多豈皆決擇况重以名家之好則忘其賦狀之非及此上聞掛於吏議既往不咎朕所以舍舊而圖新永矢弗諼爾無為矯枉而過直可

顯謨閣學士降授通奉大夫知建康府鄆僑舉淳安令舒光改官不當降官滿一期叙復正議大夫

敕具官某淳安令之獄至今人疑之朕徐考其所為主則皆吾賢卿大夫也吾賢卿大夫也而坐以繆舉之罰毋乃已重乎以爾經明行脩為海內所稱數而閱天下之士多矣門生故吏必善推擇而不苟取迺者所舉令其具如刑書邪則與其進不保其往孔子有是言矣不如刑書則是即墨大夫也豈以微文而廢善類爰棄前咎俾還故官其繼自今毋以精

失士之意益舉所知是謂忠報可

朝請大夫中書舍人樓鑰磨甚轉朝議大夫

敕計曰非所以處賢才也書勞非所以待法從也而有司以功令來上曰某人當進其官則朕亦重改焉耳具官某以文墨議論方代予言自吾與丞相執政進退群臣當不當功罪爾皆得以可否是正于其間分職授任亦異於百辟矣績用益彰聲望益茂則等而上之不過三數官皆將以待汝爾屑以課日月增秩為事尚朕訓辭以須明陟可

曾 知嚴州

敕具官某贛川之曾人物相望仕至二千石者前後以十數厥聲茂焉爾習于家傳有志於古試以郡寄有志於民還奏便朝嘉其詳練惟嚴陵之輔郡實高廟之潛藩分以五符司撫吾民由小州得大州益勉厥職以大爾家可



林大中磨勘轉官

教討日非所以待賢能也循次非所以優法從也而有司以  
功令告是為舊章庸可廢乎具官某以直道正臺綱至于累  
歲以身退紆州組殆將終更際之懋官一階不足酬也况夫  
訓詞深厚感議剴切朕甚嘉之乎而有司會課姑惟增秩其  
尚敦承以須殊獎可

奉國軍節度使開府儀同三司充萬壽觀使夏執中  
所生母郡夫人沈氏贈崇國夫人

教詩人誦后夫人之賢必以為某人之子之孫之甥之姪蓋  
推本其所從來不一而足也具官某所生母具位沈氏作配  
名門雅有淑德是生賢嗣為國元舅日者朕緣申伯之誼加  
錫命數視儀鼎司夫寵其身而不及其母豈所以宏貴外氏  
之祧乎是生不露膏沐之賜而死無以慰蓼莪之恩也爰有

郡封陞華上國尚敬明恩永繼爾後可

故妻郡夫人譙氏贈寧國夫人

敕公卿將相處貴侶之勢而不驕非獨其身賢也警戒相成  
暇育內助具官某故妻具位譙氏嘗為吾舅氏之配與之共  
隱約矣今以吾舅申錫命數視儀鼎司敬共不遠退若初筮  
推本所自非有如齊風雞鳴之配然耶夫生有中饋之勞而  
不及從夫之爵死祔於姑之室猶未離於郡小君也則吾外  
氏之祧尚有遺恨曹陟上國庸慰幽冥尚敬明恩益相夫予  
可



Large stylized watermark or seal, possibly containing the characters '德' (De) and '記' (Ji), reading '德記' (Deji).

Faint vertical text columns on the right page, likely bleed-through from the reverse side of the leaf. The text is illegible due to fading.

Small vertical text on the right edge of the page, possibly a page number or marginal note.



